

摘藻堂四庫全書薈要

集部

欽定四庫全書薈要

集部

御選明詩卷

五
六

詳校官原任主事

臣李斯咏

欽定四庫全書薈要卷一萬八千五百五

集部

御選明詩卷五

樂府歌行二

黃肅

仙人篇

翩翩騎白鹿言上泰山頂俯觀浮世中不見百年影道
逢古時人綠髮被兩領授我採藥訣延年保壽命我聞
再拜跪問是何方求撫我挾我肘與我上天遊天上多



桂樹枝葉何脩脩
折取忽盈筥
馨香沾我裘
何因入君袖
道路長悠悠

陶凱

竹枝詞

白鹽山水流急
白帝城邊楓葉稀
唱斷竹枝人不見
山頭月落鷓鴣飛

孫作

大堤曲二首

君騎白馬來我騎青驄去背面不相識兩馬驕嘶住
漢水可方舟大堤容兩輪春風堤上花不入漢陽津

謝肅

馬陵行

客行忽不樂停車馬陵間上有悲風古樹之蕭瑟下有
哀壑流水之崢嶸潺湲陰深壞道餘古雪蘄巖兩壁堆積鐵
石面苔封勁箭痕草頭露滴將軍血青燐火黃昏明
呼號木魅啼山精應羞勿頸償斷足此氣千載真難平

西流沂水東滄海勝負孫龐兩安在為提寶劍舞尊前
落日雲霞射光采

唐肅

秋江曲

妾家住銀塘石楠秋葉香憶君蕩槳去江水與愁長西
風夜泣蒹花露鴨嘴岸低人不度冷莎如鍼刺煙素鴛
鴦飛來鸕鷀去

銅井迎送龍辭

伐鼓兮吹簫迎我龍兮山椒龍之都兮何所泉淵淵兮
石為戶叩龍車兮乞靈龍不出兮我心若醒我心若醒
兮龍寧勿聆

我叩龍兮龍卹風旋波兮龍出龍之出兮福予變旱爍
兮為澍龍為澍兮我弗飢返山椒兮雲旗風泠然兮龍
歸

王立中

竹枝詞

孤山梅花開雪中恰似阿儂冰雪容不學畫橋南畔柳
春來容易嫁東風

張紳

日出行

東方曈曈日初出田家少婦當窗織屋頭樹稀窗有光
小姑娘起不暇妝長梭軋軋秋絲密一日上機催一匹
丁寧小郎慎勿啼織成令汝穿完衣

捕雀詞

原頭霜深秋草薄荒邨小兒捕黃雀高張弓矢低網羅
日暮競比誰得多野田吹火拾枯樹一半煨燒雜山芋
北風吹草毛血腥各自騎牛唱歌去我身不惜充爾飢
空城黃口待汝歸

丁麟

西湖竹枝詞

湧金門外春水多賣魚船子小於梭三三兩兩唱歌去
驚起鴛鴦飛奈何

秦約

江之水寄揚鐵厓

江之水流瀾瀾蕩漾雙鳬舟涉江采蘭芷蘭芷青青露
如洗下有一雙魴與鯉美人美人胡不來相思日暮江
風起

戈鎬

春曉詞

鴉啼細柳東方明井上轆轤牽水聲花奴滿堂開翠屏

銀爐燒麝素煙輕
西原落落秦川路
白馬花鞭幾時去
落花昨夜飛成團
蝴蝶歸來及春暮

淶水詞

紅船壓秋綠水澀
藕根香昨夜龍沙月
鴛鴦夢薄霜秋
彎埽蛾翠生色染
絲黃為報潯陽客
行雲不下堂

周愷

白紵詞

井梧墜葉聲如雨
轆轤夜靜莎雞語
西里佳人怨薄寒

惆悵燈前歌白紵白紵新時白若霜象牀開合秋水光
製成只恐香塵汙衣著偏宜九夏涼西風乍入羅幃裏
數點清塵不禁洗競開篋笥試新紵舊服拋捐那復理
嗟爾白紵怨勿深憐新棄舊他人心願將貞白永相保
今年卷却明年討

桃李吟

我為桃李吟聲調一何苦昨日滿園花今朝半塵土桃
李不長春苦調難再陳君看道傍婦昔日朱門人

程國儒

信州糧謠

信州糧糧何艱十鍾一石萬里間朝發錢王堤暮過嚴
子灘柁尾白浪如銀山朝渡蘭溪州暮泊龍丘灣峻如
牽車上鬼關督吏持檄夜如箭布帆無風河水乾去年
糧船未及岸今年又運八百萬只知彼地荒不知浙東
天亦旱只知彼地饑不知役戶家無飯家無飯儂莫愁
願化鐵騎為耕牛願銷鋒鏑為鉏耰戰場闢作畝與溝

壯士荷甲歸西疇風雨時調禾黍秋禾黍不秋飯不足
浙東又移何郡粟

馬琬

西湖竹枝詞

湖頭女兒二十多春山兩點明秋波自從湖上送郎去
至今不唱江南歌

蔡哲

武夷九曲漁歌

昔日羣仙跨鶴翎至今猿鳥嘯青冥
草堂亦有逃名客漫唱漁歌仔細聽

一曲溪頭春意濃紫煙深鎖幔亭峰
仙源好似桃源路無數飛花泛水紅

二曲高峰瀉激湍娉婷玉女髻螺寒
祇應姑射能相似未許巫山得並看

三曲仙機隱碧岑琅玕芝草正蕭森
山頭夜半聞天樂只有漁郎是賞音

四曲風煙日渰淒縈紆巖谷互高低丹光照樹明於月
驚起金雞半夜啼

五曲溪山秀且奇就中佳趣有誰知紫陽可是能清賞
夜擁寒爐註楚辭

六曲雲屏不可攀綠雲千頃鳥聲閒層崖亦有仙人掌
何必騎驢入華山

七曲巖前太姥巖落花飛雨晝參參天風夜捲浮雲去
贏得明蟾浸碧潭

八曲平洲即要津
太和宮裏碧桃春
匆匆多少遊山者
到得源頭有幾人

九曲空明眼界寬
仙家雞犬半林端
千巖萬壑春如許
誰解窮源艤擢看

劉炳

行路難

奉君五綵鳳凰之綺幄
七寶鴛鴦之錦牀
博山氤氲之
冰屑金盤沆瀣之瓊漿
春風無情不相待
朱顏綠鬢年

年改姑蘇臺上鼓如雷
四時歌舞百花開
當年意氣今安在
鬼火如燈秋似海

桃葉青

桃葉青青杏花吐
樓頭吹笙教鸚鵡
紅牙象板按梁州
金縷衣裳美人舞
離情不似月常圓
桃葉青青似去年
美人不來鸚鵡怨
杏花零落畫樓前

雙桐生空井

井上雙梧桐
秋風易搖落
綠葉墮鳴璫
清陰捲重幄
紋

甃生旅葵銀瓶響空索疎枝覆烏臺交柯臨鳳閣美人
矜容儀照影傷今昨鉛華逐波逝歡賞隨年薄行客攀
輓轡哀聲隔簾箔

寒夜怨

月來愁亦來心憐月去愁應改樓高月轉遲停箏坐倚
熏籠待月落却成眠誰知枕冷愁仍在

田家樂寄張師孟

田家樂今年莊農好秋作蟄龍蛻骨桔槔懸五穀咸登

時雨若官家更憂民力疲公田折布能輕贍小姑娘攜筐
懶梳洗拾得綿花如雪肥大姑軋軋催機杼疎簾樹影
寒蛩語鬢雲籠霧颺西風眉月生涼褪秋暑山徑牛羊
下夕墟蕭蕭榆柳草堂虛野老杖藜邀小酌諸孫燈火
讀殘書

郭奎

烏夜啼

石頭城上烏遙夜鳴相呼紫清道士有兩樹烏啼不離

樹高處千聲啞啞復萬聲中堂酒闌夢未成呼童把燭
起開戶照樹惟恐鄰人驚庭前再拜為爾說我家舊住
長淮北慈親已老返哺違零落猶為異鄉客嚴霜滿天
江月輝東方未白羣星稀明朝日出當早飛莫使涕淚
沾裳衣

陳汝言

製衣詞

妾把春蠶絲動向寒窗織織成鴛鴦紋洗花染春色誰

知裁剪時為郎三歎息郎身別已久長短今未識聊將
夢中見彷彿試刀尺霜天萬里塗特寄淚沾臆願郎衣
著時細看針線跡

鄭定

南風謠

南風吹河河水滿百丈牽舟牛力挽逆流巨浪如登天
牛罷輒重舟不前作書投河訟風伯多助南商疎北客
北客家居南海堧來時南風吹北船武夷清冷過九曲

匡廬疊嶂間清猿片帆搖搖出京口夜倚淮雲瞻北斗
南風五月經呂梁兩岸青山如馬走今年作客還南遊
南風正爾當船頭風神與我若相識十日五日成淹留
南風何多北風少南北人生如過鳥早晚回船望北歸
直候南風吹到曉

高郵女兒歌

高郵湖水清且幽高郵女兒能盪舟十八梳妝好高髻
二十嫁夫長遠遊青菱鏡破寶釵折翡翠衾寒疊香雪

芳草王孫去不歸
蟋蟀啼處秦樓月
樓前楊柳飛絮多
門外蛛絲成網羅
高郵湖水增夕波
高郵女兒將奈何

李璫

踏車行

南岸北岸聲咿啞
東鄰西鄰踏水車
車輪風生雷轉軸
平地雪寒生浪花
借問老農何太苦
低頭欲語還咨嗟
前月有雨田未耘
非其種者紛如麻
縣吏捉人應差役
令嚴豈得營私家
況當今日滴雨無
陂塘之水爭喧譁

雖如抱甕沃焦釜蹄涔豈足供泥沙語罷踏車車轉急
田水何如汗流濕老妻貸穀猶未歸力疾無奈吞聲泣
王澤

和湘竹龍歌為杜彥清

湘娥古竹生湘水恨血秋凝淚花紫玲瓏五竅開宮徵
君山老龍精不死江南十月逢杜清酒酣為吹孤鳳鳴
自言十五住帝京髣髴猶記鈞天聲鈞天夢落江漢遠
紫塞鴻歸漫腸斷相逢不必問艱難綠髮蕭蕭素霜滿

請郎再吹予再聽思入九點蒼梧青素女瑤瑟不敢怨
一夜湘中愁百靈

胡翰

越水操

越水泔泔兮不可以方舟旋桓有魚兮不可以為鱸九
罇寸目兮豈不密且周惟魴及鮪兮竭澤是求有獺有
獺兮復跂於洲

貝瓊

真真曲 有序

姚文公為承旨時一日玉堂燕集聲伎畢奏有真
真者操南音公疑而問之泣對曰妾建寧人西山
之苗裔也父司筦庫於濟寧坐盜用縣官財賣妾
以償遂流落倡家公憫之遣使白丞相三寶努為
落籍且謂翰林屬官王扶曰汝無妻以此姬配汝
吾即其父也貲裝皆出於公扶字扶華後官至翰
林待制噫以西山之賢子孫陵遲疑不至於此然

辱於始而正於終是亦天也簣谷筆談記其事予

乃賦四十二韻而沉鬱悽婉亦足以盡其大略矣

斷絲棄道邊何日緣長松墮羽別炎洲不復巢梧桐請

君且勿飲聽我歌懊懷在昔全盛時冠蓋紛相從盤游

易水上意氣天山雄金刀手割鮮酒給葡萄濃坐有一

枝春秀色不可雙娉婷劉碧玉綽約商玲瓏寶髻金崔

釵已覺燕趙空或聞操南音未解歌北風上客驚且疑

姓字初未通問之慙復泣乃起陳始終妾本建寧女遠

出西山翁父母生妾時謂是金母童梨花鎖院落燕子
窺簾櫳迢迢官朔方南歸山水重侵貸國有刑桎梏加
父躬粥女以自贖白璧淪泥中秋娘教歌舞聲價傾新
豐永為倡家婦遂屬梨園工覽鏡拂新翠吹簫和小紅
身居十二樓屢入明光宮京華多少年門外嘶青驄自
傷妾薄命失路隨秋蓬不如孟光醜猶得嫁梁鴻客間
為三歎祖德寧未崇回黃忽變綠人事何匆匆有客傷
緹縈無人憐蔡邕遣使白丞相削籍歸舊宗小史三十

餘勿恨相如窮配汝執箕帚今夕看乘龍鴛鴦並玉樹
鸚鵡開金籠銀甲不復整紅牙不復從提甕自汲水絺
綌亦御冬應非事羊侃頗類歸建封琵琶感商婦老大
猶西東崔徽怨顓頊浪寫丹青容依依章臺柳落絮春
無蹤小妾恨題驛竟與瓊奴同時多困坎坷事或欣遭
逢焉知百尺井歛登羣玉峰借問為者誰內相姚文公

張宣

采蓮曲和朱秦仲

吳娃盪蘭槳采蓮戲綠波苦心留翠房低頭避高荷采
蓮不得藕刺傷將奈何涼風動影扇因之發陽阿

孤鳳吟

梧桐生高岡枝葉蔭成林上有孤飛鳳結巢在其陰毛
羽爛五采噤噤鳴好音虞舜去已遠王風不可尋來儀
苟非時亦何異凡禽

錢宰

採菱曲四首

綠柳橫塘曲滄灣是妾家菱歌不解唱秋水照荷花
落日浣紗渚菱歌唱晚風解衣濯秋水乘月採芙蓉
溪上採蓮女秋波照晚妝心如蓮子苦情似藕絲長
荷葉紉為佩芙蓉緝作裳妾心花下藕節節是秋霜

童冀

水車行

零陵水車風作輪緣江夜響盤空雲輪盤團團徑三丈
水聲却在風輪上大江日夜東北流高岸低圻開深溝

輪盤引水入溝去分送高田種禾黍盤盤自轉不用人
年年祇用修車輪往年比屋搜軍伍全家載下西涼府
十家無有三家存水車卧地多作薪荒田無人復愁旱
極目黃茅接長坂年來兒長成丁夫旋開荒田納官租
官租不闕足家食家家復藉水田力一車之力食十家
十家不憚勤修車但願人常在家車在軸不憂禾黍秋
不熟

鬲泥行

朝甯泥暮甯泥河水澆田河岸低吳中有田多涵斥河
水高於田數尺雨淋浪拍岸善崩歲歲甯泥增岸塍載
泥船小水易入船頭踏人船尾立吳兒使竹勝使篙竹
筐澆泥如濁醪水流泥滑似沃焦岸上浮土何如高此
身便作淘河鳥河水終多泥漸少君不聞越上之田高
於城連車引水千尺坑車聲軋軋夜達明田間濁水無
時盈吳田苦澇越苦旱越水常慳吳水滿嗟乎世間至
平惟水猶不平請君不用觀世情

烏斯道

馬食粟

馬食粟一閑二百匹一食一百斛去年大旱人苦飢草
根食盡食木皮官司徵粟喂官馬馬何貴重人何微人
心不敢怨只願官馬肥官馬肥走若飛江南江北正格
鬪將軍殺賊要馬騎

葉子奇

懊惱曲

綠珠酒半酣吹笛對明月金谷樓正高萬騎已如雪

許繼

下嶺樵歌

石磴緣蒼蒼負薪下層峭歌聲相應發山木閃殘照近
驚幽谷響遠荅清猿嘯欵乃江上音煙波豈同調

結交行

識人人識已騰口自相譽譽至毀亦隨憂患安能去寵
公不入城孔明拜牀下識士不欲多乃是知人者

胡奎

吳江竹枝詞

青裙女兒雙髻螺
唱出吳宮子夜歌
酒醒月明眠不得
秋風吹起太湖波

第四橋邊楓葉秋
青裙少婦木蘭舟
月明打槳唱歌去
驚起蘆花雙白鷗

西山日落東山黃
儂唱竹枝行晚涼
十幅蒲帆弓樣滿
南風吹送白龍堂

管訥

遠遊篇

御風日萬里逍遙登遠遊竦身青冥表瞬息四顧周
力隘八極壯志局九州泰山小封垤滄海眇浮漚俯視
瀕洞間萬彙等蜉蝣浩歌挾洪崖長嘯訪浮丘迴聽款
閭闔謁帝十二樓酌我紫霞觴遺我青鳳裘授以長生
訣塵劫三千秋從茲謝流俗大塊同悠悠

劉秩

裁衣行

裁衣須裁短短衣
短衣上馬輕如飛
縫袖須縫窄窄袖
袖窄彎弓不礙肘
短衣窄袖樣時新
殷勤寄與從軍人
願郎著衣便弓馬
破敵長驅古城下
明年佩印披紫緋
裁衣不比從軍時

吳斌

青州歌

青州高城雄九州
城門天上飛瓊樓
羽林兵衛若熊虎

劍戟耀日寒光浮迢迢紫陌香塵起車馬爭馳迅流水
飛甍萬井碧鱗鱗綠樹連陰柳營裏嵯峨城闕帝子宮
天上遙鎮滄海東海波鏡淨寂不動鯨鯢不敢揚天風
樓上銀壺漏初歇畫角龍吟泣霜月寒聲蕭颯落梅花
吹作征人鬢中雪

量田謠

朝量水田雪暮量山田月青山白水人如雲朝暮量田
幾時歇尺田寸地須盡量絲毫增入無留藏時暘時雨

欣時康我民欲報心未央年年增賦輸太倉安得長風
天外起吹倒崑崙填海水更出桑田千萬里

醉歌行

登高取醉散我愁倒卧城南百尺之酒樓出門但知行
路苦醉鄉可以逍遙遊君不能遺身天上玉京又不
能營名將相專金城徒將綠髮染春雪風塵羈紲終無
成不如且飲一壺酒酒盡愁消更何有

唐仲實

秋胡行

依依陌上桑婉婉桑間婦
嫣然紅羅襦采桑濕香霧
相逢馬上郎停鞭一回顧
回頭遺巧笑脉脉此情露
誰知婦人身託生膠漆固
本期骨肉親反被紅顏誤
憶昔送郎時徙倚門前樹
篋笥滿征裳一一裁繒素
繡為雙鴛鴦猶懼觀者妬
願郎早歸來恨不與俱去
塵埃撲牀帷蛸蟥網窗戶
上有白髮姑羞以衷情訴
可憐不相識春心拋中路
倉皇下馬時忽忽意未晤
洞房埽春蠶一見

生愧負妾身固可棄老親寧弗慕黃金無虧盈白璧有
點汙嫁郎恩義乖何如江水赴江水惟東流不似郎他
顧

馬貫

和西湖竹枝詞

吳姬軋軋小車紅爭來陌上看春風不敢高聲唱歌去
恐驚丞相在船中

百花樓頭聞馬嘶郎從花裏鬪金雞朝朝捲起珠簾望

不是郎歸不下梯

張翼

西湖竹枝詞

南高北高峰頂齊
錢唐江水隔湖西
不得潮頭到湖口
郎船今夜泊西溪

袁華

和鐵崖先生蹋踰篇

冶家女兒髻偏梳
教坊出入不受呼
蹙金小鞵飛雙鳧

飛雙鳬曳雙袂玉圍腰珠絡臂

盧昭

精衛詞

有鳥志堙海銜石到海返石轉心不移但礪爾喙短日
復夕海復遠石可竭海可滿精衛之恨何時斷

古意

良人去悠悠出川還入洛不省道里遠但愁風水惡胡
為不懷歸日夜苦淒泊道遠終致之車輪不生角楚楚

生紵衣去時與郎著勿遣塵土縑塵縑徒澣濯妄言諒
無說生死時有託金多詎云貴飲水祇自樂

曹睿

西湖竹枝詞

昨夜西湖月色多照見郎君金叵羅明朝江頭放船去
江亭風雨奈君何

金文徵

玉仙謠

同楊孟載和
阮孝思作

紫皇宮闕開中天，鸞書畫下邀羣仙。
神麈玉斲新蹄圓，蹀躞上送雙嬋娟。
虹垂橋雲沓路鞭，敲風馭騰霧寶幢。
金節相後先，宛在銀河影邊渡。
侍兒顏色春花明，照耀十二樓五城。
飄飄宮徵相諧鳴，按歌齊唱昇天行。
昇天未成曲愁壓，巫山綠朝朝暮暮。
湘水深湘妃，帝子徒勞心東飛。
烏西飛兔海變桑田，知幾度燭龍肯緩義和轡。
流光應向人間住，流光不住將奈何。
坐令蛾黛秋霜多，手摩銅狄嗟蹉跎。
人生誰似學仙好，翠掃鬢華長不老。

下視寰垓入煙草
峩峩瓊臺夢杳
眇丹霞姿旁人可望
不可追
珮環一落空中響
世上猶存千載思

吳文泰

青樓曲

青樓少婦懸明璫
軟金刺繡羅衣裳
纖歌宛轉聲繞梁
圍屏狎坐飛瓊觴
流蘇錦帳雙鴛鴦
夢魂醉入溫柔鄉
東風破暖吹紅香
落花點點更漏長
游絲飛絮春茫茫
柔腸一寸生秋霜
吳山青青江水綠
燕語鶯啼空斷腸

橫塘採蓮詞

采蓮度橫塘荷花遠近香
花間擘蓮子多半是空房

陳伯康

秋千辭

梨花庭院香飄滿
架架秋千笑聲軟
紅妝共鬪青春妍
長繩欲繫白日短
掌中飛燕旋風斜
樓外綠珠墜落花
素娥弄蟾奔竊藥
秦女乘鸞初去家
半空著脚看亦好
平地失身更顛倒
人生行樂貪少年
昔時女伴今皆老

慵來聽說摧眉峰
整頓衣裳為斂容
玉樽餘酒醉不得
月明高架粉牆空

黎貞

行路難

君不見天上浮雲任舒卷
白衣蒼狗須臾變
又不見瞿塘嘈嘈水倒流
奔湍激石能覆舟
人情有時亦如此
紛紛輕薄何足比
平常意氣同死生
急難何堪託終始
嶺南狂客窶且貧
長將青眼待時人
豈知此道不足貴
翻

使臯鶴儔雞羣不如託身與鷺鷥蓬蒿之下同逍遙

鄭真

石梁謠

東屯西屯雲晝陰上關下關淮水深淮水遠從天上去
美人不見愁人心

袁宗

車遙遙

車遙遙天未明銅龍鼓響霜滿城驅車出門何處行貨

多車重牛不進竹鞭鞭牛牛力盡車遥遥不可留我身
願化車下輪千里萬里從君遊車遥遥不可止我身願
化山下石摧君之車君乃已

江南弄二解

妾家橫塘東與郎乍相逢郎來不須問門外植梧桐
妾家橫塘西春花壓枝低綠波淨如鏡只著鴛鴦栖

莫種樹

莫種樹種樹枝葉稠春雨枝枝泣秋風葉葉愁

曉寒曲

秋江夜雨芙蓉老翡翠雙飛下紅蓼鯉魚風起鴻鴈悲
徹骨清寒夢魂杳碧紗如煙隔啼鳥龜甲屏風香篆小
阿侯白馬不歸來被冷鴛鴦洞房曉

鐵簫歌

滇江夜半風雨黑電火燒空轟霹靂須臾雨霽波浪恬
江壖脫却蒼龍脊道人騎鯨江上來見之錯愕驚而咤
拾得歸來世希罕土花繡澀生莓苔上有空星泛宮徵

嶰谷蒼筤豈堪比六丁鼓鞀神功成百鍊金精雪花起
一吹潛蛟舞載吹嫠婦泣孤鸞長吟音嫋嫋碎玉玲瓏
真可拾酒酣為我三復吹青天行雲不敢飛初如七十
二鳳聲雄雌又若獨繭抽出冰蠶絲東望蓬萊山把酒
招安期飄飄清興不可遏聽君一曲歌我詩曲終酒盡
客且散西軒月在梨花枝

蔣惠

有所思

白日不可掇何為易西沉美人天一方與我如商參江
空朔風勁殊無鴻鴈音娟娟隔秋水風夕勞我心

宋璩

採桑曲

桑芽露春微似粟小姑把蠶試新浴素翎頻掃細於蟻
嫩葉纖纖初上指朝採桑暮採桑採桑不得盈頃筐羞
將辛苦向姑語妾命自知桑葉比家中蠶早未成眠大
姑已賣新絲錢岸上何人紫花馬却欲拋金桑樹下

劉琬

自君之出矣四首

自君之出矣金爐煙不裊思君如露桃紅淚墮春曉
自君之出矣蟬鬢枯可燎思君如流螢持明徒自照
自君之出矣瑤瑟塵滿柱思君如迴風旋轉無定處
自君之出矣芳香銷玉體思君如河水堅凝直到底

王掖

馬頭曲

鑾刀割燔羊官甕瀉桐馬更衣蘭房中弔影銀燈下
王門激楚曲相府西涼調愁中換宮商郎母看妾笑
王攝

馬頭曲

蜥蜴飼丹砂鴛鴦置金鎖東風獨何情楊花起還墮

孫蕢

吳宮四時白紵詞

姑蘇臺上春風和江花亂落江水波交疏楊柳綠參差

華筵夜列開綺羅當筵西施間羣娥朱顏為君起微酡
自拈紅牙節清歌飛花著人思繁多華月耿耿度斜河
疎星出河夜欲過烏啼啞啞奈爾何

閶門輦路薰風時江光潋灩芙蓉披翠羽霓旌照洲渚
鑾輿出遊初避暑西施含顰嬌不語羣娥鬪起歌白紵
回風舞袖為君舉歌聲窈窕一何長白紵之白白如霜
木瓜花紅荔子香東江月出西江光銀壺酒多樂未央
館娃宮畔風蕭蕭芙蓉墮香楊柳凋銀河影淡烏鵲橋

熒熒雙星麗碧霄美人微醉臉紅潮
筵前舉袖催玉簫
舉歌白紵鬪嬌嬈越羅楚練風飄飄
此時奉君情欲絕
銅龍夜深宮水咽銀牀低轉梧桐月

北風吹江日宛宛江天飛雪簾櫳滿
美人臺上鬪腰肢
羽觴流霞照華瑄筵前西施含醉眼
歌停綠水聲欲緩
羣娥玉環低款款別宿臺前水仙館
芙蓉帳高錦雲暖
儂覺寒宵作那短

梁父吟

江水何深深青楓映雲林衡門一杯酒抱膝梁父吟君
不見夷吾奮袂投南冠故人薦引登君門揚眉吐論下
荆楚九合冠裳朝至尊又不見樂生徒步從西來燕昭
一擁帚調笑黃金臺轅門一日建旌節七十齊城生暮
埃古來英俊人所遇皆有立袖有驪龍珠能令鬼神泣
而我獨何為幽宮凍蛟蟄荒蘿遶屋秋雨涼山鬼吹燈
冷光濕幾欲乘雲朝太清芙蓉縹緲白玉京天田角井
散飛霧阿香布鼓琅璫鳴星辰可望不可即手把琅玕

空復情為臣自古良獨難我更懷之摧肺肝田疆古治
三猛士昔者虎視青齊間誤罹相國二桃計恨血今為
春草斑白頭黥舊且如此何況新知無覩顏梁父吟聲
正苦日落未落天星黃西園灌木秋楚楚青青千里草
如霧兀兀當塗高踞虎長陵百尺空嵯峨夜半山精泣
風雨世無女媧五色石天柱欲倩何人補荊州水碧岷
峨青思美王孫渺何許梁父吟聲苦傷歌闌玉壺缺白
髮千丈長起坐擊長劒仰天悲流光西歸白日為誰晚

東流之水何泱泱青冥黃鵠倘垂翅我亦凌風隨爾翔

湖州樂

湖州溪水穿城郭傍水人家起樓閣春風垂柳綠軒窗
細雨飛花濕簾幙四月五月南風來當門處處芰荷開
吳姬畫舫小於斛蕩槳出城沿月回菰蒲浪深迷白紵
有時隔花聞笑語鯉魚風起燕飛斜菱歌聲入鴛鴦渚
雲南樂

成都賈客向人語黎州多風雜多雨雪山萬古長不消

山下四時風氣暑竹林西畔是雲南不論冬夏披羶衫
蠻官見客花布襖邛婦背鹽青竹籃繩橋跨澗石截寨
部落馬蹄皆灌鐵引筒貫索通客行插木入崖防棧絕
邛筒酒熟蠻人歌太平今喜無兵戈懸車不戍相公嶺
賣馬安行大渡河牛纓換貨躋邛笮路出彭門緣劒閣
火井秋篁截洞簫幾腔吹作雲南樂

古意

山礬花落春風起吹妾芳情渡江水夢中蝴蝶相交飛

門外鵲聲郎馬歸

蠶婦詞

朝看箔上蠶暮收繭上絲絲成給日食不得身上衣早
知阿家蠶事苦不若當初學歌舞

黃哲

白苧詞

長洲宮中花月輝彩雲夜傍瓊樓飛吳姬娉婷白苧衣
揚蘭拂蕙春風歸花籌傳觴注紅玉月鏡當筵掩明燭

低環按節宮調促嫣然一轉亂心曲夜長酒多懽未足
驚烏啼向東苑樹星河闌干正當戶明眸皓齒歌白苧
蛾眉嬋娟花月妒含情奉君君莫顧雲中璧月易盈虧
葉底穠華多盛衰願為寶階千歲石長近君王雙履綦

烏棲曲

九月過姑蘇江頭霜草枯西風吹葉盡愁殺夜棲烏棲
烏明月裏霜重驚還起無處託安巢啞啞渡江水江波
淺復深東去無還心白苧吳宮曲能成哀怨音只言歡

樂長相保青春幾時秋又老可憐西子斷腸花不及虞
姬美人草舞罷垂楊金縷衣椒房絳燭明星稀越騎爭
馳海山動吳歌尚繞梁塵飛梁塵飛飛白苧哀烏啼夜
半閭門開鴟夷浮江麋鹿來月明猶照姑蘇臺

自君之出矣

自君之出矣無處託鱗音思君如畫燭淚盡不明心
將進酒贈彭生秉德

華燭照廣席錦瑟彈朱絲一彈再三歎進酒卿莫辭丈

夫成名垂不朽彭生早試穿揚手彩鳳朝鳴岡上桐驪
駒暮繫門前柳門前柳條冬尚青城南桂漿翻玉瓶觥
船滿引百分勸出門不顧蓬中螢君不聞洛陽賈生對
宣室長安九衢皆動色長安九衢橫九天爾如神駒當
自力我昔侍從金門中誓師牧野初成功功成治定四
海同條牧再見承平風爾行決科期第一狐裘蒙茸髮
如漆莫辭更盡金屈卮直上排雲振雙翮

短歌行與藍山陳彥中

桂水秋風高扁舟過蘋末西來佳公子袖拂湟川月公
子芳年狐白裘抱琴來訪丹山丘雲邊舉手相笑揖凌
雲意氣橫清秋高談雅論傾四座自言曾到燕山遊雪
中射虎隨飛將原上呼鷹從列侯酒酣馳向城南獵騰
身飛空輕一瞥赤手獲得千年狐路人縱觀誇勇捷卿
家嚴君誰得如湘南昔日專城居將門有將今復見見
此滄波明月珠明珠白璧相照耀知音更學絲桐妙傳
得吳儂子夜歌彈為楚客陽春調爾有吳越思言之使

我迷罷琴惆悵孤月落哀猿老樹臨雙溪他年同泛山
陰雪聽爾琴中烏夜啼

折楊柳枝詞戲贈朱文昭

綠陰馳道繞隋宮拂雨撩煙送晚風萬樹千條都折盡
不堪回首畫橋東

李德

塘上行

露濕藕花香花折藕絲長豈無鳬與鴈不似錦鴛鴦

林鴻

寄衣曲

漢月絳庭樹邊霜拂城樓遠人一夜寒深閨始知秋起
來理征衣纖手一何柔雙杵幾不勝寸心未能休梧葉
下浙浙草蛩閑幽幽月明嗟慰意風急復含愁白露下
蘭心蘭心亦枯槁妾家有高臺下有漁陽道明發寄征
人三挹薜蘿草

浦源

結交行

敵國不在遠舟中乃可見炎涼不在時交情乃可知昔
作通家好齊言永相保一富有一貧便成行路人相逢
不相識薄夫堪歎息我不願傾北海樽亦不願書翟公
門但願同心二三子百年無改同生死

竹枝詞

紅漆車兒駕白羊吳鹽空灑竹枝香不知羊角如心曲
纔聽車輪欲斷腸

趙迪

采蓮歌擬王子安

采蓮歌歌采蓮鬢雲斜墜黃金蟬
蘭橈畫舫清江曲珠
鈿羅裙凝雲綠葉翠花紅恨想容
鴉黃粉白情如玉江
上休隨鴻鴈飛花前莫作鴛鴦宿
采蓮歌歌轉遲嬌歌
聲斷綵雲飛芳情暗結蓮心苦
閒愁極亂藕中絲采蓮
莫采葉葉色青如妾妾心長與江
水清花顏未久先凋
零可憐秦羅敷日出東南隅持筐
桑中去薄暮逢秋胡

何如雲水花深處占得風光江上居采蓮不知遠舟行
莫忘返花紅蕩人心葉綠迷人眼蒲荷零亂空瀟瀟采
蓮自小慣乘潮江中風浪何飄飄共怨良人千里外顧
影殘妝恨未消

錢萼

鐵笛謠

鐵厓仙人冠鐵冠錦袍不著衣褐寬棄官流蕩山水窟
胸中奇氣蛟龍蟠手持鐵笛竅有九錚錚三尺青琅玕

吹之奇聲絕人世抑揚悲壯凌雲端鍊厓山高高百尺
片片吹落梅花寒太湖老漁狎唱清江歌仙人側卧吹
回波七十二峰翠鸞舞大雷小雷走深渦君山弄最奇
絕一聲草木摧兩聲山石裂三聲蜿蜒躍波起四聲捲
海作飛雪五聲山岳盡動搖六聲百鳥皆噤舌七聲吐
氣成虹霓搏桑枝上金雞啼八聲凝光射牛斗丹桂枝
邊玉貌吼九聲十聲迸銀河鬼神股慄天嵯峨河鼓輟
瓊耜天孫停玉梭九重震疊開蕩蕩帝閭驚動忘撝訶

鈞天大奏側身聽口勅仙吏旁搜羅分甘吹笛樂吾樂
芒屨嬾上金鑾坡仙人仙人鐵石腸引喉噴鐵金琅璫
中通外竅直以剛莫耶善鳴愁鳳皇底須割截崑崙岡
願將鍊厓壽鐵笛後天不老凋三光

御選明詩卷五

欽定四庫全書薈要卷一萬八千五百六

集部

御選明詩卷六

樂府歌行三

王彛

神絃曲

紅蓮小朶金塘秋水
上弓鞬新月鈎碧日
無光靈鵲死
文星墜地銀雲起
陰股森寒間唾壺
神衣綷繒機聲裏
曲曲湖波豔神眼
十八虛鬟神自綰
寶奩掩月裊蛛絲

天促神歸神不歸

右織女廟

夔夔天鼓秋湖裏雪山曜日青山紫金鎖蛇鱗百尺身
領得江中萬魚起女巫亂乳飲龍孫兩蕊芙蓉瀉秋水
神絃張張風雨黃明珠一夜照龍堂三江水渾龍濯足
明朝化作林中綠

右滬瀆龍王廟

梁寅

玉階怨

團扇且棄置夕氣涼轉添流螢點魚鑰墮葉近蝦簾羅
衣舊恩賜不令珠淚沾

怨歌行

寶釵頭上千黃金可憐墮井無復尋情知秋嶺朝朝淡
愁似春江日日深

陶宗儀

折楊柳送夏西疇謫居大梁

折楊柳贈君別楊柳未折心已折丈夫落落志四方到此誰能不嗚咽江南九月天雨霜鴈聲墮地秋風長出門行行幾千里寒煙落日增離傷令嚴獨許攜家室藤笈編花載書帙可憐身上千金裘阿嬈手縫鍼線密吾聞中原百戰餘民物鮮少城邑虛君去結廬得幽勝便可小擬西疇居荆榛塞路猛虎伏髑髏如山冤鬼哭願言緩轡毋疾驅疾驅恐妨傷馬足折楊柳歌苦詞呼酒酌君君莫辭黃河之水東南馳人生會合還有時

饒歌鼓吹曲二章

并序

丙午夏秋之交彌月不雨民以菑告錢塘張野賓
者得法於靜樂君禱輒有應時留松江郡父老請
建壇城北門翼日乃雨大夫士作為文章歌咏以
美之因製漢饒歌鼓吹曲二首云

屢豐年羣生熙癘我旱寧怨咨星火烈螟螽滋苗而不
秀歲且薦饑精誠格天聽允惟念之命幽靈擊妖魘龍

膺捷疾先後馳金精流光淫虹縻四溟靈鍵甘雨時積
水彌九野稔而可期不殄禋祀上帝是祈

早既甚張君闡化也君積功累行有禱而天
應之

早既甚金石流苗患槁民煩憂疇能祈天致天雨曰惟
張君驗之屢雩壇長跪恭進詞黑札玄文啟雷祖閔陽
縱陰理則然叱電鞭霆一何武暘烏鬱光祝融奔淵龍
起蟄商羊舞甘澤及我私田里長驩娛擊壤歌至正厥

功匪君誰

暮春謠奉和正齋承旨韻

風颺颺雨蕭蕭東皇促駕車載膏墮紅殘萼芳草深嬌
香壓地膩不消繡屏寒逗熏沈腦愁重燕支倦梳掃玉
關萬里人未歸風雨一番春又老

劉仔肩

春曉曲

紫絲複帳流蘇結雲母屏風疊香雪門前嬌柳乳鴉啼

暖漏丁丁曉將徹花枝入簾紅尚小蘭露著衣香不歇
江南行客歸未歸芳草春風滿城闕

黃樞

婺州竹枝詞

桃花雨晴春水生東風去船如箭行鯉魚活煮蘭溪酒
蓬底醉眠江月明

陳週

倚竹歌

修竹兮青青中虛兮外直素節兮貞姿寒暑兮一色冷
冷兮朝夕予舍之兮焉適

梁蘭

遠將歸

遠將歸歸來苦不早黃河西沒不復歸鐵衣夜夜眠秋
草遠將歸歸來在何時明年二月桃花飛郎時歸來妾
下機便裁白紵縫春衣

陳緝

竹枝

贈君曾出雙南金別君曾彈紫綺琴斷金還比阿儂意
斷絃持比阿郎心

黎充輝

山雲辭將歸作

清江兮淙淙上有山兮穹窿白雲兮谷口一碧兮千峰
晦靄兮絕壁挂偃蹇兮長松朝迎兮秋陽暮卷兮秋風
山之人兮雲從被薜荔兮褰芙蓉來乘雲兮朝九重跨

一鶴兮江東點汀花兮白蘋雨霜葉兮丹楓忽雲歸兮
人遠山蒼蒼兮倚晴空

茹湜

楊白花

楊白花身輕不由已一夕長風生飄飄渡江水江南處
處好繁華悠揚落地知誰家知誰家不復歸永巷春深
人跡稀悲歌連臂空腸斷回首長秋鴉亂飛

謝常

簫杖曲

簫杖者黃大癡之珍玩也杖乃湘竹一枝皇英淚
血斑儼在修不逾五尺竅兩節間而吹之聲清剛
而奇淵魚臯禽驚騰應和非止嫋嫋餘音而已提
之出遊以古錦囊蒙其首人謂筇枝在握不知為
簫管也遇佳山水處或當風清月白之夜啟囊出
弄聞者有飄飄然仙舉之意大癡晚遊華岳山不
知所終傳於松陵谷祥徐氏余嘗艤舟垂虹徐為

按舊習洞仙歌水龍吟詞數闋因製曲贈之

桂楫蘭舟誰弔古往尋美竹瀟湘浦淋漓恨血染秋煙
千載娥皇淚痕苦當時得之無所施愛同海底珊瑚枝
金刀橫截瘦蛟頸刻作玲瓏簫管吹驪珠上連星點七
竅竅清圓俱應律有時提挈坐花前葛陂老龍眠在膝
世人不知何如名但見鹿斑碎點琅玕青掀髯一笑發
孤弄杖頭忽作嗚嗚聲一聲崑岡山石裂兩聲梅花盡
飛雪三聲羣仙飛珮聽四聲吹墮瑤臺月五聲銀潢驚

倒流霜凋蘆葉風鳴秋六聲鳳叫海日出吳姬斂黛凝
春愁七聲八聲毛髮簪露寒乳穴浮銀汞九聲連十怒
濤翻鯨魚鼓鬣三山動停吹起坐向客言此是黃癡之
所傳斯人已騎鵬翼去老眼摩挲今幾年我云道人休
歎息猶勝蓬萊鐵仙笛古物存亡奚足悲雲斷蒼梧暮
山碧

竹枝詞

闔閭城邊楊柳黃吳姬如花明月璫送郎不勸銀瓶酒

持贈雲鬟金鳳皇

胡溫

古歌

閩山喜鵲少越山喜鵲多如何不歸去其奈羅網何

方孝孺

蕨箕行

並海饑民千百數攜鉏上山劙山土蕨根已盡劙不休
力絕筋疲未言苦屋頭五日無炊煙十步九却行不前

全家性命係朝暮弱子假息阿母眠昨日劓蕨僅盈斗
今日蕨根不滿手但憑劓蕨保餘生再拜青山感恩厚
青山青山爾勿猜明朝未死攜鉏來

練子寧

玉山謠贈時憲

我所思兮玉山之宕堯粲芙蓉兮凌丹霄謫仙一去已
千載至今誰續廬山謠熊侯家住劔江側慣埽秋山之
黛色聞余此興為寫之彷彿梅仙舊時宅梅仙兮何在

邈清風兮滄海蹇夷猶兮孤舟弔遺跡於千載舟中所
載非凡流羌故人兮李與周按玉笙兮明月下黃鵠兮
清秋洞天兮石扇蒼崖兮路轉橫余劍兮視八荒訪蓬
萊兮幾清淺張侯兮昂藏驂白鶴兮青霓裳窺玉梁之
寶笈醉石髓之瓊漿千巖萬轉路莫測酒酣一醉三山
窄待得君王賜鑑湖錦袍重訪山中客

周是脩

商婦怨

作木莫作桑樹枝作女莫作商人妻桑枝歲歲苦攀折
商婦年年感離別桑枝折盡猶解抽人老豈有重青頭
強龍猛虎皆可執其奈夫壻心難留朔風吹江浪如屋
施樓嘈嘈行色促望殺蒼天哀憤深目斷雲山淚成掬
何能化作檣頭燕到處飛飛得相見何能化作帆上風
千里萬里長相從爺娘嫁我初何意但道商人每多利
門前宴集盡輿馬筐筐聘來足珠翠豈知今日遇分張
輿馬珠翠看無光月懸別恨秋宵永花撓離思春書長

妾心豈學道傍柳朝朝暮暮千人手妾心豈學空中雲
變易隨時情何有妾心可似南山石雨打霜侵只如昔
更看歲晚不歸來化作南山一拳石

桑婦謠

採桑婦朝朝暮暮南園路出入寧論晴與雨蠶盛愁桑
稀蠶衰恐姑怒大眠起來忙更忙寢食不遑兒不顧年
年養蠶多繭絲身上到頭無一縷小半輸官大半賣繰
織未成先有主可憐寸寸手中過竟作何人襖衫去采

盡桑葉空留樹樹下青青長麻苧山雞角角終日啼桑
椹漸紅春雨住妾尚無襦夫少袴

牧童謠

遠牧牛朝出東溪溪上頭溪頭草短牛不住直過水南
芳草洲脫衣渡水隨牛去黃蘆颯颯風和雨老鴉亂啼
野羊走絕谷無人驚四顧寒藤枯木暮山蒼同伴相呼
歸又忙石稜割脚茅割耳身上無有乾衣裳却思昨日
西邊好曠坂平原盡豐草短蓑一卧午風輕長笛三吹

夕陽早

解縉

怨歌行

絃奏鈞天素娥之寶瑟酒斟流霞碧海之瑤杯宿君七
寶流蘇之錦帳坐我九成白玉之仙臺臺高帳煖春寒
薄金縷輕身掌中托結成比翼天上期不羨連枝世間
樂歲歲年年樂未涯鴉黃粉白澹相宜卷衣羞比秦王
女抱衾誰賦宵征詩參差雙鳳裁筠管不謂年華有凋

換楚園未泣章華魚漢宮忍聽長門雁長門蕭條秋影
稀粉屏珠級流螢飛苔生舞席塵蒙鏡空傍閑階尋履
綦宛宛清揚日將暮惆悵君恩棄中路妾心如月君不
知斜倚雲和雙淚垂

踏青行

春風綠遍天涯路滿院殘紅不知處西家有酒不肯賒
愁坐茅簷日將暮出門時作踏青行晴川雲暖花冥冥
時人塤管吹落日難為一段江南情

楊士奇

江南行

家住橫塘口船開去漸遙
歸時不愁暮出浦正乘潮
偶來長浦裏相伴采蓮歸
並船打兩槳滅水濕羅衣

楊白花

楊白花逐風起含霜弄雪太輕盈
蕩日搖春無定止樓中美人雙翠顰
坐見紛紛渡江水天長水闊花渺茫
一曲悲歌思千里

巫山高

巫山高，高十二峰連崖疊巘如游龍。
當時陽臺下神女，翠斂紅銷空處所。
朝朝峽裏望氛氲，可憐猶似作行雲。
相思已下沾裳淚，況復猿聲不可聞。

古意答伯陽

河洲雙鴛鴦，流蕩還相逐。
皎皎白楊花，風吹不相續。

胡儼

烏棲曲二首

階前候蟲鳴唧唧機上美人不成織含情下階望天河
鵲橋橫練正無波

夜半烏啼月將落金釭青熒照羅幕抱琴試鼓白頭吟
淒淒切切難為心

採蓮曲二首

荷葉高低籠水碧葉下花紅露霑濕採蓮渡頭風正急
風正急櫂船歸雲片片雨霏霏

湖中花豔張紅雲湖上女兒新茜裙清歌妙曲隔花聞

隔花聞聲宛轉跡雖親心獨遠

採得荷花香滿衣與郎相見思依依
晚涼湖上並船歸
並船歸桂為楫激清波蕩明月

四時詞

春風吹簾斜簾開飛柳花美人高堂上見此惜年華
年華容易隨春草一雙蛾眉鏡中老

碧水汎迴塘新荷豔曉妝看花臨綺檻愛此雙鴛鴦
鴛鴦宛轉迴塘路相對朝朝還暮暮

秋露白如玉
梧桐墜寒綠
文犀鎮錦帷
紅淚消銀燭
銀燭輕搖翡翠煙
孤影熒熒夜不眠

葉落深閨靜
露零宵鶴警
玉井凍無聲
夢迴寒夜永
夜永銅龍漏幽咽
小窓斜轉梅花月

遠將歸

去年與郎別
楊花飛白雪
今年候郎歸
楊柳綠依依
聞郎買船下湘渚
日日門前望行人
過盡乳鴉啼徘徊
日暮空延佇
攬衣回洞房
對鏡卸新妝
那知清漏短

但愛明月光
月光照席涼
於水帳裏
燈花撒紅蕊
好事從來不浪傳
明日升堂報姑喜

楊柳枝詞四首

晝畫樓前雨歇時
千絲萬縷綠垂垂
無端却被風吹起
撩亂春心不自持

罩水和煙萬葉重
倚風飛絮曉昏昏
莫教吹落長河去
化作浮萍無定蹤

門外春風楊柳枝
去年折柳送郎時
車輪一去無消息

只有長條依舊垂

畫簾風動影絲絲
曳綠搖金晝景遲
睡起倚闌看蛺蝶
鶯聲只在最高枝

四時詞

海棠睡足東風曉
金爐香燼餘煙裊
遊子傷心未得歸
迢迢綠遍天涯草
錦屏圍暖樹交花
清露流珠溼絳霞
窗前有夢隨蝴蝶
門外無人啼乳鴉

綠陰門下垂青子
庭院深沉雙燕語
金縷鶯穿楊柳風

白頭人卧芭蕉雨林中新笋已交加
猶自階前有落花
長卿多病心如雪閑却平生書五車

銀河星淡流雲濕蒼苔露滴莎雞泣
久客蕭條未授衣
誰家搥練聲聲急嘹唳驚聞過雁低
更堪烏鵲又爭栖
援琴欲鼓清商調月冷風淒意轉迷

開遍梅花雪初落深寒尚覺貂裘薄
紙帳偏宜白髮酣
茶甌却被青娥謔閑來索笑對湯婆
枕席相從年頗多
莫怪老夫今冷落故衾猶是賜兜羅

王璩

瑶琴怨

多情莫學澤中蘭，有恨莫爲江上蓮。
蓮蘭心守死心不改，蓮根折斷絲猶牽。
君不見天荒地老皆如此，千古湘娥怨湘水。
至今血淚灑叢篁，點點香含露痕紫。
沅陽西望煙淒淒，鷓鴣飛入煙中啼。
蒼梧波杳彩雲滅，萬里孤光秋月迷。
西風北渚蘋花白，歸夢未知身是客。
夜彈瑤瑟渡江來，九疑翠黛濃如滴。

和高季迪將進酒

君不見雲中月清光乍圓還又缺君不見枝上花容華
不久落塵沙一生一死人皆有綠髮朱顏豈能久樽前
但使酒如澠肘後何須印懸斗咸陽黃犬悔已遲至今
千載令人嗤試看古來功業士何如陌上冶遊兒百年
飄忽寄宇內日日歡娛能幾歲勸君莫惜囊中金便趁
生前常買醉臨邛壚頭綠蟻香柳花捲雪春茫茫吳姬
越女嬌相向痛飲須盡三十觴興來狂笑縱所適慎勿

畏他權貴客東風吹落頭上巾此日獨醒端可惜一朝
綺羅生網塵妝樓空鎖青娥人酒星不照九泉下孤鳥
自哢山花春解我金貂脫君素裘白日既沒秉燭遨遊
君為我舞我為君歌歌舞相合其樂如何

王偁

車遥遥

車輪何遥遥西上長安道不見車上人空悲道傍草君
行日已遠恩愛難自保憂來當何如一夕夢顛倒豈無

中山酒一浣我懷抱但恐三春華顏色不再好車聲何
鱗鱗風吹馬蹄塵願隨馬蹄塵飛逐君車輪

長歌行

有淚莫泣鮫人珠有足莫獻荆山玉赤心徒使按劍猜
至寶翻令笑魚目千金蹈海稱達人五噫出關西去秦
負芻不復遇知己空歌白石南山春楚卿棄相復何有
於陵甘作灌園叟雜縣偶集魯東門惆悵胡能事杯酒
長風蕭騷百草殘長鋏悲歌涕汎瀾金臺駿骨久已化

瑤水風波不可攀畏途羊腸能折軸緘書為謝雲間鵠
海上三花久負期醉歸漫託平原宿

行路難

倚劍且勿歎聽我行路難世塗反覆多波瀾焦原九折
未為艱君不見漢謠斗粟歌未闌長門一夕秋草殘骨
肉之恩尚如此何況他人方寸間又不見絳侯身榮應
繫獄賈生終對長沙鵬功成更覺小吏尊才高寧避明
時逐所以赤松子遠赴中林期誰能吳江上見笑鸚夷

皮驪龍有珠在滄海勸君逆鱗勿嬰之子推介山下屈
原湘水湄當時枘鑿自不量至今憔悴令人悲行路難
難為言滄浪一櫂且歸去長安大道橫青天

短歌行

東風吹花墮錦筵綠楊半顰青樓煙主人自為鴝鵒舞
小妓更奏鴛鴦絃當杯入手君不醉落日已在西山巔
短歌一曲心茫然請看明鏡高臺上何須白髮悲芳年

君馬黃

君馬黃我馬白二馬同嘶出南陌南陌東阡夾渭橋馬
行平地似青霄羈金絡月人皆羨振玉鳴珂意自驕朝
出相隨暮相逐可憐人馬皆如玉如何與君生別離君
馬東行我馬西欲知後夜長鳴處羞對鴛鴦一萬蹄

王恭

妾薄命

玉釵墮地無全股雙鳳蟠龍兩分去雖藏匣底終棄損
欲賣傍人不值錢轆轤宛轉黃金井手挽銅餅繫纖綆

誰知綆斷餅墮泉千尺深沉不窺影銅餅墮泉釵墮地
君心何得生離異

去婦詞

刺促何刺促東家迎鸞西家哭哭聲休使東家聞東家
新婦嫁郎君滿堂笑語看珠翠夾道風傳蘭麝熏浮雲
上天花落樹君心一失無回悟明知遣妾何所歸飲淚
行尋出門路青銅鏡面無光采苦心尚在容華改東家
新婦傾城姿似妾從前初嫁時

王紱

吳姬留客行

吳姬年少纔十六能抱琵琶唱新曲愁連山黛鎖青娥
汗透霞綃濕香玉問郎今去宿誰家郎須聽妾彈琵琶
吳城有酒不肯住已姬未必顏如花遲留那得情相與
芳心一一絃中語空江霜落叫征鴻孤櫂風高響秋雨
須臾彷彿臨三湘切切哀猿堪斷腸巫陽雲暗楚臺晚
故山不見關山長彈到胡笳少三拍郎心欲去何忽迫

挽郎不住郎過船滿江月色秋潮白

折楊柳詞

每為多情記別離道傍披拂亂如絲東風也學時人態
偏向柔條恣意吹

鄒緝

行路難

請君勿言苦我歌行路難世事有反覆人心若波瀾布
衣扼奪卿相位禍讐起自杯酒間君不見昔時山東一

匹夫讀書往往輕凡愚談笑強於唐舉相搖鞭西入咸
陽都一言啖秦王再言扼范睢黃金束帶高堂居風雲
變態生須臾君不見魏其都位漢公卿灌夫意氣排漢
廷武安本在門下列拜伏跪起呼父兄一朝寵據要津
地舊時意態寧復生竇嬰既失勢潁水亦不清狂呼罵
坐何足驚咸陽市上殊無情行路難行路難人生自古
有如此何須局促增歎聲

陳繼

烏夜啼

宮井烏啼宮樹碧
月色生寒露華白
啞啞不斷深夜閑
明朝車馬天際還
綠窗美人歡不寐
未曉凝妝貼珠翠

漁父詞

江柳陰江水深
釣船不到江之心
江心風高浪相激
縱使魚多不易得
釣絲只在江邊垂
得魚無魚心自怡
有時投竿把書讀
殘陽漸紅江轉綠
有時沽酒醉風前
沙鷗忘機相對眠
人生富貴那足羨
好似春鴻與秋燕
江

柳陰江水深釣船不到江之心

袁珙

長相思

有美人兮天一方丹霞為織雲錦裳盤龍舞鳳交鴛鴦
昔年飲我瓊瑤漿贈我白玉雙明璫欲往從之楚山長
安得羽翼同翱翔望望不見令我傷仰天悲歌涕浪浪
明月在戶光滿堂牽牛織女遙相當長相思愁未央

郭武

乞巧詞

明河拖天玉繩遠新月掐雲銀甲淺
丁東細漏滴金荷
百子樓前桂花滿
三三五五試新妝
鶴扇如霜羅帶長
雲母屏前齊下拜
絞綃帳底共焚香
焚香爭乞天孫巧
穿斷蛛絲繡針小
夢裏傳來是有無
入門巧已知多少
織女牽牛別有情
螢飛鵲度兩難憑
芙蓉舞困西風薄
楊柳垂低北斗橫

烏夜啼

金井梧桐霜葉飛寒鳥啞啞中夜啼蘭閨少婦停燈宿
夢見征人塞上歸相思未訴鳥驚起千結柔腸碧窓裏
鵲絃羞澀掩瑤琴線斷紅珠泪如洗啼啞啞聲不住牽
轆轤逐鳥去

閨中曲

寒衣剪就金刀冷雲母屏空對孤影心知井底墜銀餅
猶把轆轤牽斷綆

王直

豔歌行

翩翩春歸鴈秋至復來翔如何遠遊子兄弟各異方
山川何迢迢參辰夜相望寒風日以厲零露結為霜空林
靜無人但見明月光徘徊不能寐徙倚臨中堂睠彼南
飛翼故鄉安可忘

周忱

棄婦辭

回車已駕衡門下欲去復留情不捨舉家欲語畏郎嗔

獨自登車無送者，吞悲惟恐路人知。
默默還思初嫁時，父母殷勤受明禮。
良媒宛轉來通辭，入門即聽舅姑語。
婦道營生在勤苦，淡妝不用畫蛾眉。
朝採蠶桑暮機杼，亦知樸陋人所厭。
習成天性終難變，丈夫有才常好新。
賤妾薄命何嗟怨，綠絲在車猶未除。
亭午當炊誰下厨，但得新人亦似此。
庶免高堂煩老姑，到家無面見鄰姬。
獨掩寒閨雙淚垂，小時只恨青春促。
今日方愁年老遲。

李禎

楊柳枝二首

參差幾樹瞰長河
樹樹垂金拂綠波
不是秋來易零落
自緣人世別離多

細葉如眉綠未勻
修眉渾似帶愁顰
輸他桃杏東風裏
不管南遊北去人

薛瑄

竹枝歌

錦官城東多水樓
蜀姬酒濃消客愁
醉來忘却家山道

勸君莫作錦城遊

于謙

古意

妾顏如花命如葉嫁得良人傷遠別
別來獨自守空閨
夜夜焚香拜明月月缺重圓會有期
人生何得久別離
願將身託蟾蜍影照見良人不寐時

採蓮曲

朝採蓮暮採蓮蓮花豔冶蓮葉鮮
花好容顏不常好葉

似羅裙怨秋早秋風浩蕩吹碧波綠怨紅愁將奈何年
年採蓮逞顏色采得蓮花竟何益蓮花雖好却無情夫
婿有情常作客萬里關河歸未得爭如池上錦鴛鴦雙
去雙來到頭白采蓮復采蓮采蓮還可憐願比蓮花與
蓮葉不論生死根相連

落花吟

昨日花開樹頭紅今日花落樹頭空
花開花落尋常事未必皆因一夜風
人生行樂須少年老去看花亦可憐

典衣沽酒花前飲醉埽落花鋪地眠風吹花落依芳草
翠點胭脂顏色好韶光有限蝶空忙歲月無情人自老
眼看春盡為花愁可惜朱顏變白頭莫遣花飛江上去
殘紅易逐水東流

擬吳儂曲

憶郎直憶到如今誰料恩深怨亦深刻木為雞啼不得
元來有口却無心

遊春曲

垂楊拂地如青絲，輕盈不奈東風吹。馬上誰家游俠兒，
雕鞍玉勒黃金羈。張弓放彈如星馳，正中流鶯落樹枝。
衆中大笑稱絕奇，揚鞭走馬當路歧。忽聞鞦韆笑語嬉，
隔牆竚立情如癡。牆裏佳人顰黛眉，留情不語知伊誰。
分明相望不相知，恨無羽翼通佳期。夕陽啼鳥催分離，
可憐兩地空相思。

春晝曲

東風吹花花不定，紅雨紛紛落芳徑。喚人啼鳥隔紗窗，

巧語關情誰忍聽柔腸百結苦縈回却似丁香花未開
花開花謝年年事可惜流光如箭催門外紅塵飛紫陌
陌上垂楊弄春色垂楊只解送行人不管行人歸未得

折楊柳

折楊柳折得柔條持在手慙慙贈與遠行人人去書來
莫厭頻明年柳發黃金芽却望歸轅早到家春來春去
須臾事莫待漫天飛雪花折楊柳愁思多短長亭畔崎
嶇路送盡行人奈爾何

張栢

漢宮曲

日暮上簾鉤
春花壓翠樓
忽聞宣召急
羅帕掩箜篌

古詞

羅帕凝香濕
朱櫻窗外雨
生寒燈花知
是虛傳喜
落盡青煤誓
不看

宮中詞

宮中楊柳戲青娥
不見葳蕤舞鳳過
怪底東風不相忌

隔牆吹送落花多

江南春

滿川啼鳥怨殘紅
水郭春園柳絮風
春雨一番江水闊
草痕將綠到吳中

采蓮曲

青綾裙子試新裁
水面風吹拂拂開
舟小身輕波復靜
荷花蕩裏去還來

江南曲

忽得三巴信
郎歸未有期
只言風浪險
不是薄情兒

瞿佑

春愁曲

杏雨調泥隨燕嘴
煙重柳條扶不起
採香蝴蝶挂蛛絲
不惜將身為花死
東風入幕動流蘇
寶篆燒殘睡鴨爐
繡牀塵積錦機怨
巧語誰能憑紫姑
小砑吳牋雙鳳翅
墨痕濃沁相思字
玉釵半脫帕蒙頭
寬盡玲瓏金纏臂

春社詞

十日一風五日雨社前拜祝神已許瓦盆潑醢濁醪
高俎縱橫薦肥羜嗚嗚笛聲坎坎鼓俚曲山歌互吞吐
老巫狡獪神有靈傳得神言為神舞祭餘分肉巫自與
醉裏狂言相爾汝小兒覓餅大兒扶頭上神花付鄰女

車遥遥

少年離別多苦辛驅車何處問通津停轅勸飲一杯酒
酒飲未盡車磷磷十步百步聞車聲三里五里望車塵
車聲已斷車塵遠何況遥遥車上人

春鶯轉曲

西清詩話宋駙馬都尉王晉卿歌姬名轉春鶯晉卿投南春鶯為勢家所得晉卿南還汝陰道中聞歌聲曰此轉春鶯也訪之果然賦詩曰佳人已屬沙吒利義士今無古押衙回首風光雖尚在春鶯休轉上林花

停驂惆悵惜芳時嶺海歸來兩鬢絲縱使鶯聲如舊好綠楊都是折殘枝

西湖竹枝詞

西子湖邊楊柳枝
千條萬縷盡垂絲
東風日暮花如雪
飛入雕牆兩不知

看燈詞

傀儡妝成出教坊
彩旗前引兩三行
郭郎鮑老休相笑
畢竟何人舞袖長

風簾珠翠動紛紛
笑語聲喧隔戶聞
明月滿街天似水
不知何處著行雲

東家斫竹縛山棚西舍邀人合鳳笙官府榜文初出了
今宵喜得晚來晴

銷金小繖揭高標紅藕青梅滿擔挑依舊承平風景在
街頭吹徹賣餚簫

文錦坊西後市南鬧竿挑過百花籃少年遊子誇輕俊
拾得雙頭碧玉簪

村裏兒童暫入城隨羣齊上大街行歸來徹夜渾忘睡
從此春田懶去耕

義士行

鍊金鑄范蠡買絲繡平原逝者恐無知徒用勞心魂陋
矣哉烏江八十軍壯矣哉海島五百人任安念舊不改
轍豫讓報讐須殺身酒不必澆劉伶墳上土劍不必挂
徐君墓前樹感君恩重死相從冥漠重泉有逢處

施敬

秋塘曲

蓮謝秋塘晚風來野水香采蓮休采葉留蓋睡鴛鴦

塞上曲

八月秋高塞草斑將軍千騎獵前山彎弓不射南飛鴈
恐有征人附信還

劉績

去婦詞

去婦兩眼淚為君滴平生一滴致妾意再滴感君情三
滴眼欲枯血點淋香纓不滴堂前花死株有時榮不滴
階畔草苦心展芳萌請滴橋下水長煎嗚咽聲

蕩婦怨

蕩子行天涯行行日去賒
詎知閨中婦夙昔減容華
憶夫上青山下車逢狹邪
路遙不可見拭淚徒怨嗟
慎勿令婦嗟蕩子蚤還家
不應靡蕪草竟作菖蒲花

結客行

結客千金盡酬恩一劍存
羞為狗盜伍不傍孟嘗門

蓮塘謠

疊翠參差水容淨蘭芽半吐蒲根冷
膩極紅蓮怨臉明

霞綃委墜千重影藕腸斷處絲暗牽荷露學珠那得圓
小姑羅袂拂秋月鏡裏紅妝只自憐吳歛響斷平橋晚
溝水漾愁愁不淺搖蕩輕撓泛濫光銀塘鷓鴣雙飛遠

秋清曲

吳紗織霧圍香玉八尺銀屏畫生綠睡鴨氤氲惹夢長
重城漏板聲相續西風淅淅吹蘭塘雲波微茫連洞房
芙蓉膩臉啼秋露怨綠愁紅俱斷腸交河萬里知何處
啁哳金雞報天曙玉鬃駿馬歸不歸含情自折相思樹

鄭嘉

幼女詞

下牀著新衣初學小姑拜
低頭羞見人雙手結裙帶

陳靖遠

姑惡行

芳池月陰春草碧有鳥有鳥鳴不息
千聲萬聲道姑惡
新婦低回淚痕落姑惡姑惡姑不惡
努力窗前勤織作
嗟爾小鳥胡不思新婦會有作姑時

鄭關

竹枝詞

十二灘頭水接天
千山煙雨萬山煙
自從前路風波惡
不敢回頭望別船

李進

花遊曲

飛花入簾宮
漏長游絲落絮春
茫茫金鞍駿馬青絲勒
綺閣小姬紅粉妝
黃金作丸落花底
啼鳥隔花飛不起

明朝更欲載東風早賣湖船放春水

張瓘

君子有所思行

騁駕向名都縱觀極西京煌煌九衢裏列第起朱甍虹
梁駕層漢輦閣臨紫清高槐蔭金溝弱柳垂雕楹前揚
許史鑣後懸金張旌燕姬撫瑤瑟趙女彈鳴箏歡娛豈
終極為樂擬千齡清川去悠悠白日光易傾金谷歎綠
珠上蔡悲蒼鷹繁華會當歇大運有虧盈勿嗤黔婁室

寂寞掩柴荆

洞房曲

鷓鴣夜宿迷濛柳斗帳燒燈蠟光透銀罌注酒芙蓉香
金絲檀槽為君奏哥喉窸窸鶯兒語象口吹香凝碧縷
盤龍繡帶結同心牽惹巫雲隨峽雨歌聲未闌香未滅
曲屏生香暈眼纈小玉催鋪蜀錦衾紗牕影轉桐花月

春曉曲

濛濛碧柳垂輕煙露花千朶蘸脂鮮東風無力颺羅幙

曉閣香溫人正眠春眠更比春酣重情深每作相思夢
間關黃鳥莫驚啼正是離人相見時海棠嬌多扶不起
簾外日高花影移

楊白花

輕盈楊白花風吹渡江去金屋閉重重莫鎖楊花住
嬈好春怨


太液柳垂絲昭陽花滿枝如何長信草獨是見春遲
朱純

怨詞

井上梧桐樹密葉何沉沉傷心昨夜月照見雙棲禽



御選明詩卷六



總校官庶吉士臣侍朝

校對官檢討臣蕭九成

謄錄舉人臣傅瓌芳